



Sud Bosne i Hercegovine
Суд Босне и Херцеговине

Broj; S1 3 Iž 039618 21 Iž
Sarajevo; 26.01.2021.godine

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Dinke Bešlagić Čovrk i Srete Crnjaka kao članova vijeća, odlučujući o žalbi političke stranke KOALICIJA MOJA ADRESA SREBRENICA (SDA-SBIH-SBB-PDA) stranka sa sjedištem u Sarajevu ul. Mehmeda Spahe br. 14, koja osporava odluke Centralne izborne komisije Bosne i Hercegovine, broj: 05-1-07-1-95/21 od 21.01.2021. godine, o poništavanju Lokalnih izbora održanih dana 15.11.2020. godine u izbornoj jedinici Srebrenica za nivo načelnika Opštine Srebrenica i Skupštinu opštine Srebrenica na 28 biračkih mjesta, na nejavnoj sjednici održanoj dana 26.01.2021. godine donio je

R J E Š E N J E

Žalba se odbija kao neosnovana.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, o poništavanju izbora održanih dana 15.11.2020. godine u izbornoj jedinici Srebrenica za nivo načelnika Opštine Srebrenica i Skupštinu opštine Srebrenica na 28 biračkih mjesta za Lokalne izbore 2020. godine.

Ovu odluku žalbom pobija KOALICIJA MOJA ADRESA SREBRENICA (SDA-SBIH-SBB-PDA) zbog nepotpuno i netačno utvrđenog činjeničnog stanja. U žalbi navodi da je podnio prigovor Centralnoj izbornoj komisiji BiH zbog loše procjene utvrđivanja rokova za blagovremeno izjašnjavanje birača koji glasaju putem pošte, čime su ovi birači onemogućeni da ostvare biračko pravo u skladu sa Izbornim zakonom BiH. Cijeli proces dostavljanja glasačkih paketa biračima je kasnio 15 do 30 dana, a neki nisu upućeni van BiH ni do izbora. Na izvodu iz Centralnog biračkog spiska za opštinu Srebrenica nalazi se 2419 birača, dok je Centralna izborna komisija izvršila verifikaciju oko 1400 koverata pristiglih do predviđenog roka 25.11.2020. godine. Na navedeni način je velikom broju građana Srebrenice onemogućeno da ostvare svoje biračko pravo. U pobijanoj odluci CIK-a navodi se da je izvršeno brojanje glasačkih listića pristiglih putem pošte, ne navodeći da nije izvršeno brojanje svih glasačkih listića pristiglih putem pošte.

Predlaže da se žalba uvaži i naloži Centralnoj izbornoj komisiji BiH da donese novu ili izvrši dopunu postojeće Odluke broj: 05-1-07-1-95/21 od 21.01.2021. godine o poništavanju izbora i putem pošte u izbornoj jedinici Srebrenica za nivo načelnika opštine Srebrenica i Skupštinu opštine Srebrenica.

Centralna izborna komisija Bosne i Hercegovine dostavila je ovom sudu odgovor na žalbu u kojem je istakla da je žalba neosnovana i da su ožalbenom odlukom poništeni izbori na biračkim mjestima na kojim su utvrđene nepravilnosti koje mogu uticati na rezultate izbora. Predložila je da se žalba odbije kao neosnovana.

Žalba nije osnovana.

Prema shvatanju apelacionog vijeća, pobijana odluka Centralne izborne komisije BiH broj: 05-1-07-1-95/21 od 21.01.2021. godine, kojom se poništavaju izbori održani dana 15.11.2020. godine na 28 biračkih mjesta u izbornoj jedinici Srebrenica za nivo načelnika Opštine Srebrenica i Skupštinu opštine Srebrenica je zakonita i pravilna.

Iz predmeta spisa proizilazi da su Odlukom o raspisivanju i održavanju Lokalnih izbora 2020. godine između ostalog raspisani izbori za izbori za načelnika Opštine Srebrenica i Skupštinu Opštine Srebrenica. Nadalje, Centralna izborna komisija je zaprimila prigovor ovjerenog političkog subjekta Koalicija „Moja adresa Srebrenica“ ukazujući na neregularnosti izbornog procesa na biračkim mjestima u izbornoj jedinici Srebrenica. Cijeneći sve informacije Centralna izborna komisija BiH je pokrenula postupak po sužbenoj dužnosti, zbog osnovane sumnje da su povrijeđena pravila izbornog procesa i izbornih prava na biračkim mjestima u osnovnoj jedinici Srebrenica.

Nakon uvida u skenirane Zapisnike o radu biračkog odbora, izjašnjenje Općinske izborne komisije Srebrenica, skenirani izvod iz Centralnog biračkog spiska, angažovanje vještaka grafologa, Centralna izborna komisija BiH je donijela ožalbenu odluku kojom je poništila izbore na 28 biračkih mjesta u izbornoj jedinici Srebrenica za navedene nivoe.

Obrazloženje odluke Centralne izborne komisije BiH sadrži argumentovane razloge za poništenje izbora na taksativno navedenih 28 biračkih mjesta navođenjem na kojim biračkim mjestima su utvrđene nepravilnosti, u čemu se nepravilnosti ogledaju i na osnovu čega su utvrđene. Sva utvrđenja navedena u osporavanom rješenju proizilaze iz stanja spisa, pa ovo vijeće nalazi kao pravilan i konačni zaključak da su utvrđene nepravilnosti na 28 biračkih mjesta u izbornoj jedinici Srebrenica nesumljivo utiču na izborni rezultat. Time su ostvareni zakonski uslovi za primjenu odredbe člana 2.10 Izbornog zakona BiH (Sl. Glasnik BiH br. 23/01 sa izmjenama) na kojoj je ožalbeno rješenje i zasnovano.

Žalba KOALICIJE MOJA ADRESA SREBRENICA (SDA-SBIH-SBB-PDA) ne osporava pravilnost utvrđenja razloga za donošenje predmetne odluke CIK-a kako u pogledu utvrđenih činjenica na kojima je zasnovana, tako i u pogledu primjene materijalnog prava. Nepravilnost ožalbene odluke žalilac vidi u činjenici što nisu poništeni izbori i putem pošte u izbornoj jedinici Srebrenica za nivo načelnika opštine Srebrenica i Skupštine opštine Srebrenica.

Prema odredbi člana 2.10 Izbornog zakona dato je ovlaštenje CIK-u BiH da poništi izbore u izbornoj jedinici ili na nekom biračkom mjestu ako prilikom glasanja ili brojanja glasačkih listića dođe do nepravilnosti koje utiču na rezultat izbora. Iz obrazloženja ožalbenog rješenja jasno proizilazi da su utvrđene nepravilnosti na 28 biračkih mjesta, zbog čega su poništeni izbori u toj izbornoj jedinici.

Nepravilnosti koje su utvrđene na biračkim mjestima nisu utvrđene kod brojanja glasačkih listića u Glavnom centru za brojanje u Sarajevu. Postojanje istih povreda utvrđenih na biračkim mjestima na kojima su izbori poništeni CIK je cijenio na način što nije našao povrede kod brojanja glasačkih listića prispjelih putem pošte. Osim toga, akreditovanim posmatračima za posmatranje rada Glavnog centra za brojanje je bilo omogućeno posmatranje cjelokupnog procesa sortiranja i pripreme glasačkog materijala za verifikaciju, te samog procesa verifikacije glasačkog materijala i procesa brojanja glasačkih listića, na što od strane akreditovanih posmatrača nije bilo primjedi u toku navedenog procesa.

Centralna izborna komisija BiH je izvršila brojanje glasačkih listića pristiglih putem pošte primjenom odredbe člana 5.28 Izbornog zakona u vezi sa članom 31. Pravilnika o provedbi izbora u Bosni i Hercegovini. Nakon završenog procesa verifikacije glasačkih listića, u skladu sa procedurom propisanom odredbama Pravilnika o organizaciji rada i utvrđivanja rezultata glasanja u Glavnom centru za brojanje za Lokalne izbore 2020. godine od ukupno 1522 koverta dostavljene Glavnom centru za brojanje u roku propisanom Pravilnikom o provedbi izbora u BiH utvrđeno je 1401 koverti verifikovano i prebrojano dok je 121 koverta odbijena u verifikaciji.

Kada se ponove izbori na poništenim biračkim mjestima, tako utvrđeni rezultati sa prebrojanim glasovima u Glavnom centru za brojanje biće predmet potvrđivanja i objavljivanja rezultata za navedenu izbornu jedinicu.

Naime, predmetnom odlukom žalitelj nije onemogućen u podnošenju zahtjeva za ponovno brojanje glasova iz inostranstva. Nakon potvrđivanja i objavljivanja rezultata za izbornu jedinicu Srebrenica koja će se sastojati od rezultata iz ponovljenog glasanja, te rezultata utvrđenih putem mobilnog tima, glasanja nepotvrđenim glasačkim listićima i glasanja putem pošte i iz inostranstva, žalitelju će pripadati pravo podnošenja prigovora za ponovno brojanje glasačkih listića dobivenih na svaki od nabrojanih načina glasanja u kome će moći isticati pravilnost rezultata u odnosu na saznanja koja ima o svakom pojedinom načinu glasanja putem pošte.

Iz navedenih razloga apelaciono vijeće nalazi da je pobijana odluka Centralne izborne komisije Bosne i Hercegovine pravilna i zakonita, a žalba neosnovana, pa je istu primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, br. 19/02, 88/07, 83/08 i 74/10) valjalo odbiti.

**PREDSJEDNIK VIJEĆA
SUDIJA**

Vesna Trifunović